

tutti 500 *cum* l'ordene stesso, et cussi *successive* fin integro pagamento de tutto el sestier; et non possano quelli, che haverano a far tal pagamenti preterir l'ordene stesso, soto pena di privazion de l'oficio suo, et de pagar ducati 500 dil suo, da esserli tolti per li Avogadori extraordenarii senza altro Consejo; la mità di qual sia de essi Avogadori, et l'altra mità de l'Arsenal. Et quelli che saranno trati, non possino aver el pagamento del credito suo se non porterano un bolletin de Mathio de Facio scrivan ad essa camera, per el qual el faci fede haver visto et facto le rason del dicto, et reduto in resto come serà notado; et medesimamente siano trati li boletini di pro' et pagati per l'ordene che è stà dito del cavedal, non metendo più de 100 nomi de creditori per poliza, come è predicto; et dando un terzo solamente del prò per volta. El pagamento veramente sia facto per do de i oficali de la camera d'Imprestidi, zoè per uno el cavedal, per l'altro i prò. Et acciò el tuto se faci *cum* ogni rectitudine, siano obligati li dicti do oficali ogni Domenega in Colegio dar al Serenissimo Principe una poliza de tutti quelli che i haverano pagato la precedente settimana.

De parte . . . 187
De non . . . 19
Non sincere . . 0

130

Exemplum.

*Advisi da Constantinopoli, de dì
27 Dezembrio 1419.*

Che el Signor turco se trova haver galie sotil da 80 fino 100, che potrano esser conze et in ordene per tempo novo, de le qual se dia esser in ordene tutti i suoi coredi, bisognando, computando però quelle che se trovano fuori, che l'havea mandato a Syo per calafadi.

De danari è abundantia, perchè ad ogni Porta se fa vengono assai muli cargi. *Item*, de zente haverà in abundantia.

De campo veramente terestre par pur se fazi qualche movimento, come sempre verso la aperta si sol far. Ha mandato a la volta de la Valona, Castelnovo et quelli sanzachi de li che debano cavalchar sul paese di Cernogli et Montagna Negra; altri dicono per la Zimera.

De le cose de Sophi, se dice haver el suo campo lontano da Tauris circa 8 zornate per traverso in campagna con gran numero de paviglioni et persone

da 40 milia armate con assae altro numero de gente, e che lui Sophi si atrovava in optima valitudine et sanissimo; che l'havea 200 carete de artelarie et altre 100 senza.

Che tutti li circumvicini se haveano offerto a lui in adiuto achadendoli; che 'l campo de l'Imbracur, sta preparato a quelle frontiere.

Fu poi posto d'acordo, per li Savii, una letera a sier Francesco da cha' da Pexaro a Verona, *videlicet* vedi di ultimar la cossa et dir a l'orator dil Christianissimo, ch'è solo zudexe in questa materia, non achade più dar scrittura; ma lui visto e inteso il tuto, termini quello vol el dover e la justitia, perchè stando su queste proposte e negative in scrittura se anderia *in infinitum*; con altre parole; fu presa. Ave 188.

Fu posto, per tutti i Savii e Savii ai ordeni, una letera a sier Antonio Surian dotor et cavalier, orator nostro in Anglia, in risposta di sue, di 7, e di le prime, e debi ringratiar il reverendissimo Eboracense di l'optimo voler di soa signoria inclinà a la pace, et questo istesso è il voler dil Stado nostro; con altre parole et ben ditate, offerendo questo Stado a quella Maestà e soa signoria reverendissima. Fu presa di tutto il Consejo, et preso mandar la proposta di Anglia e la risposta in Franza a l'Orator nostro, aziò la comunichi a la Christianissima Maestà.

Fu posto, per sier Andrea Foscarini, sier Sebastian Justinian el cavalier, sier Sebastian Moro consieri, Savii dil Consejo e Savii di Terra ferma, excepto sier Piero da cha' da Pexaro fo provedador sora il Monte Novo, atento fosse electi, per Colegio, sier Tomà Moro e sier Gasparo Contarini compie a di 10, Provedadori *tunc* sora la camera d'Imprestidi, a dover andar a mesurar le possession dil Polesene, che non ostante sier Thomà Moro habi compito l'oficio, tutti do andar debano a far dita mesuration per esser stà quelli la mesurono per avanti, e soto la loro mesuration è stà vendute, et vadino a spexe di la Signoria nostra, *ut in parte*, con li mesuradori.

A l'incontro, sier Piero da cha' da Pexaro savio a Terra ferma, vol che, avendo compito sier Thomà Moro et acetà capitano a Vicenza, e sier Gasparo Contarini compie di breve, sia, per Colegio, balotadi li tre Provedadori al presente sora la camera d'Imprestidi, do de li qual vadino, e li Provedadori sono: Sier Giacomo Michiel qu. sier Biasio, sier Homobon

(1) La carta 130* è bianca.